

Henri Politi, rispunsevule di a gestione tecnica di i matrali di l'UEIC

"Al menu dui matrali pudarianu esse custruiti nant'à u Liamone è u Taravu"



Si criticheghja à spesso a gestione di l'acqua in Corsica, e perdite. À chì ne simu?

Da veru, a gestione di l'acqua in Corsica ùn hè tantu male. L'uffiziu di l'ecchipmentu idrolicu di Corsica distribuisce una parte di l'acqua potabile è soprattuttu quella agricola. Pà a prima, u percentuale di rendimentu hè di 85 à 90 % è pà a seconda, simu à 80 %. Ma hè vera chì avemu unu problema in piaghja orientale, dove l'attività agricola hè forte, cù un percentuale à 50 %. Ma ci vole à esse precisu. Issa perdita hè arrigistrata nant'à l'acqua venduta, micca nant'à l'acqua pigliata ind'e risorse. Mi spiegu. E perdite di l'acque cacciate da i fiumi o da e falde ùn supraneghja 20 %. I 30 % chì fermanu sò perdite causate da cuntadori frusti o di l'arrubecciu.

L'isola hè a più annacquata di u Mediterraniu ma si cerca sempre l'acqua, soprattuttu quandu s'avvicina l'estate. Mancanu i matrali?

Di sicuru. Al menu dui matrali pudarianu esse custruiti.

Induva?

Nant'à u Liamone è vicinu à Livesi, ind'u Taravu. U primu pudaria aiutà e risorse d'Aiacciu è di u so circondu quandu u si condù era statu pensatu pà vende una parte di l'acqua à a Sardegna.

Si pudaria parlà d'altri prughjetti?

Iè, quellu di Sambuciu, in Balagna, di Vadi- na, vicina à Bastia o da u Cavu accant'à à Santa Lancia di Portivechju.

Perchè 'ssu bisognu d'altri matrali?

Cù i mezi d'oghje, e pruviste d'acqua in Corsica ùn ponu supranà unu annu. Cù i scambiamenti climatici ch'è no cunniscimu, e sicchie chì sò più forte è numerose, l'isola saria di pettu à difficoltà maiò dopu à dui anni consecutivi senza acqua. Cù quella trafalata di nuvembre, ancu di grazia, pudaremu ricumpone e pruviste da qui à un mese. Ma pudemu cunnosce problemi s'è e piove eccezzionale cum'è quelle ùn fallanu micca è chì a sicchia si face di più dura. U scopu saria d'avè dui anni di pruvista, cum'è in Africa di u nor-

du o ind'a parte meridionale francese.

I matrali corsi sò troppu chjuchi?

Si pò dì, soprattuttu, chì i mezi publichi sò stati spesi cum'ellu ci vole. E dimensione di i matrali corsi rispundianu à u veru bisognu di l'isola quandu sò stati custruiti. Ind'a parte meridionale di a Francia, matrali sprupusitati sò stati custruiti in l'annate sessanta cù costi di funzionamenti enormi chì anu messu u modelu economicu in periculu. Megliu d'avè ecchipmenti più chjuchi ma più numarosi.

Ma costa caru à a natura, l'impattu d'un matrale hè abbastanza forte...

Ùn si custruisce più matrali cum'è quaranta anni fà, ancu di grazia. Hè vera chì l'impattu hè chjaru ma esiste oghje mezi pà cumpensà u scumodu. Avemu bisognu d'acqua è senza acqua ùn ci hè vita è ùn si pò parlà d'autonomia alimentaria da qui à u 2050.

I matrali ponu cutribuisce à gestisce e piene?

Ci vole esse chjaru. I matrali ch'è no cunniscimu oghje in Corsica sò fatti pà assicurà e pruviste d'acqua è micca pà cuntene e piene. Esistenu matrali cusi, sò videnti è ricevenu l'acqua di e piene pà impedisce disgrasti. Ma i matrali di Corsica, quandu elli sò pieni, ùn ponu fà di più pruvista di l'acqua di e piene.

Esistenu matrali chì permettarianu di fà pruviste di cuntene e piene?

Hè l'attualità! U 10 di farraghju, avaremu una addunata di u cumitatu incaricatu di suvirà a situazione dopu à a tempesta Fabien. Un gruppu di travagliu hè dedicatu à u matrale di Tolla. Si deve riflette à una soluzione doppia, tra pruviste di gestione di e piene. In u 2021, u congressu di a commissione incaricata di i matrali maiò di u mondu (Henri Politi face parte di 'ssa commissione internazionale, sdar) sarà urganizatu in Francia, in Marseglia, pà a prima volta dopu sessanta anni. A Corsica hè stata cuntatata chì un sughjettu abbastanza impurtante par ella sarà sviluppatu: "u matrale è u scambiamente climaticu".